



# Dräckspatz

Dr offiziell Zedel

2007 vo dr FGM

Fasnachts Gesellschaft Magden

Chlöpft er hüür ächt i dr Zyt  
S'wichtigst, wo's für d'Zürcher git  
Do meint ein us dr Szene, unverhoole  
Das Johr wird au dr Ersatzböög gstohle

Z'Basel git's e Fuessballnacht  
Mir wei dr Meischer fiire, voller Pracht  
Doch chame-n-it verliere, git's halt das  
Halb Basel immene Meer voll Tränegas

E Stück Magdner Gschicht, s'alt Turnlokal  
Eusere politische Führig, isch das egal  
Jetz isch's furt, s'weiss kein worum  
Ehrlich gseit, ich find's e chli dumm

Sami bisch e schöne Chlaus  
Dänkt der Esel, „chumm ich haus  
Dr Stall mach-i uf, mit Rabatz  
Und gang e chli uf e Hirscheplatz“

Ich glaub mir müesse jetz denn handle  
Und d'FGM ine Sportclub verwandle  
Es isch zwar blöd und au banal  
Aber die einzig Chance uf e Vereinslokal

Und müend jetz öbbe gar it meine  
Mir heige öbbis gege turnendi Vereine  
Nei mir hei's doch sälber verbockt  
Dass kei Fasnächtler im Gmeirot hockt

Vom Ärdbebe wird's gli e Spalte geh  
So öbbis hesch z'Kleihünige noni gseh  
Do ghöri ein, unde-n-ufe rüefe  
S'cha nüt passiere, mir heis lo prüefe

So wie i dr Wärbig, hani welle  
Mis Auti bim Coop uf e Parkplatz stelle  
Plötzlich han i's schärbele ghört  
Was macht au die blödi Lampe dört